

En telz habitz David dict estre belle  
Sa chere espouse et douce coulombelle ;  
Si faict saint Paul, nous priant doucement  
Que nous soyons vestus honnestement  
Pour comparer à ce jour qu'on verra  
Celle beauté qui par mort nous viendra.  
Or veillons donc comme la mere bonne,  
Qui de bonne heure appreste et bien ordonne  
Tout ce qu'il fault pour l'enfant advenir.  
Ainsi, quand vient de mort le souvenir,  
Appareillons ceste chemise blanche  
D'une innocence et simplicité franche,  
Le manteau bleu de ferme loyauté,  
Un cierge ardant de vraye charité,  
Un chapperon d'une sainte esperance,  
Cotte de foy, un bissac de science  
Et le bauldrier couvert de bon vouloir ;  
Baston soit pris de diligent pouvoir •  
Pour soustenir nostre esprit et nostre ame  
Qui là es cieux doit venir royne et dame ;  
Allaictons nous de divines mammelles  
Qu'aux saintz escriptz se demonstrent tant belles.  
Et s'il advient que par vice ou peché  
Soit nostre corps souillé et entaché,  
De l'eau tombant des yeulx de penitence  
Nous fault laver, puis en ferme fiance  
Despriserons ce tant dangereux vivre  
Et aurons fain l'autre vie poursuyvre,  
Afin que puis, à l'enfanter de mort,  
Chascun de nous renaisce sans remort,  
Comme les saintz qu'ainsi mourans nasquirent.  
Et ceulx aussi telz appareils ne feirent  
Sont tretous mortz d'une mort eternelle,